



# COOK ISLANDS CHRISTIAN CHURCH

## Executive Council

Head Office Phone: 26546 Fax: 26540 Email: [adminpub@oyster.net.ck](mailto:adminpub@oyster.net.ck) P.O. Box 93, Rarotonga, Cook Islands

~~~~~

19 Okotopa 2005

Ki te au tavini rave angaaanga katoatoa i roto i te au Ekalesia CICC i te Kuki Airani nei, New Zealand e Australia

### **KARERE NUMERO 2 MEI ROTO ATU I TE KUMITI AKAERE**

#### **1. Akatomoanga**

Kia orana akaou te katoatoa. E tau ia tatou kia akameitaki i te Atua koia tei oronga mai i teia tikaanga manea kia aravei tatou na roto i teia aenga pepa no te rua o te taime. Teia te irava ei akaaravei Evangelia ia tatou: Salamo 86.17 *“E akakite mai koe i tetai akairo ei meitaki noku, kia kite mai te aronga i makitakita mai iaku nei, ka akama atu ei; ko koe oki, e Iehova, tei tauturu mai iaku, e tei akapumaana mai iaku.”* Irinaki au e te au taeake ma te au tuaine e ka riro teia tuatua ei akamaroiroi uatu rai ia tatou e rave nei i te au apainga i roto i te au koro tatakita i roto i tona ingoa tapu nui.

Mei tei akatakaia i runga nei, ko te rua teia o te karere tei anoano te Kumiti Akaere i te tuku tika atu kia kotou ma te irinaki e kia akatotoa iatu te reira ki roto i te koro o te Atua ta kotou e utuutu na i teia tuatau. Kua aiteite te vaerua o teia karere mei te karere mua i tukuna iatu, e pera te au karere ka tuku iatu mei teia te tu kia kotou i te au tuatau ki mua. Ko te vaerua oki marira no te akakitekite ma te akamaaraara atu kia kotou e ta kotou au Ekalesia tapu, i te au mea puapinga kia vai ki roto i te ngakau e te manakonakoanga no te akatupu ana i tona anoano ki roto i te ngakau tangata.

Mei tei taikuia i roto i te karere mua, na kotou e akara e, eaa ra te atianganga tau kia kite ta kotou Ekalesia tapu i te au mea i raro nei; penei i te tuatau e uipaanga'i kotou, penei i tetai atianganga ke. Tei roto ia i to kotou au rima. Irinaki katoa au e kua oti ia kotou i te akatotoa i te karere mua, kia kore e tai'i ki teia e aere atu nei.

#### **2. Tuatua no te Enuu o te CICC koia a Tepuka i Nikao**

Kua oti ta te Roia Akamarama (legal adviser) akarakara matatio anga atu ki roto i te turanga me kore te koreromotu o teia enua tei oronga ua ia m4ai e te au atu enua i muatangana, no te akakoroanga o ta tatou nei akonoanga CICC. Kua taangaanga ana oki te Kavamani i teia enua i te au tuatau i topa, inara i te mataiti 1999, kua manako te Kavamani e kia akaokiia mai ki te CICC kia taangaanga, mei tetai atu au enua tei akaoki katoaia ki te au atu enua.

Ka akamata te kumiti iti (Tepuka sub-committee) i te taangaanga atu i te au tamanakoanga kimi puapinga no te au akakoroanga o ta tatou nei akonoanga CICC, i mua ake i te openga o teia mataiti 2005. No te maata o te tuatua e te akamarama anga no teia tumu manako, kare e rauka kia ripoti katoatoa atu i te tuatua ki roto i teia karere. Penei e pepa akamarama takake ta te kumiti iti ka tata no runga ua i teia tumu manako no te tuku atu kia kotou katoatoa a teia au tuatau ki

mua. Me kare teia e rauka, kare e manamanata, ka oronga iatu tetai ripoti katoa (full report) i roto i te uipaanga maata e tu mai nei (2007).

### **3. Parani no te Ngutuare Akateretereanga (Administration Building)**

Kua akarakara matatio te Kumiti Akaaere e toru taime i te parani tei toro ia no teia ngutuare, e kua rauka mai tetai au manako no te akameitaki atu i te parani i mua ake ka rave ia'i te angaanga. I teiane kua akaoki iatu te parani ki te opati na ratou i toro mai (Building Inspection division, Ministry of Works), no te akatano anga i te au ngai ta te Kumiti Akaaere i manako e kia akatanoia. Teia te akanoonooanga e akaraia nei:

- (i) akakite ki te atea (advertise) kia pati mai (apply) te au kamupani akatu are tei anoano e kia riro kia ratou te angaanga – Noema/Titema
- (ii) topiri te patianganga – rua o te epetoma o Titema
- (iii) akapapu te Kumiti Akaaere i te kamupani tei tau kia orongaia te angaanga kiaia – openga o Titema
- (iv) akamata te angaanga – Peperuare/Mati 2006
- (v) oti te angaanga – Okotopa 2006
- (vi) tomoanga – Noema/Titema 2006

E rua taua tei tamanakoia no teia ngutuare.

### **4. Uipaanga a te Kumiti Akaaere ki te au Directors**

Kua kapiti mai te Kumiti Akaaere i te au akateretere (Directors) o te au mangamanga o ta tatou nei akonoanga ki roto i te toru o tana uipaanga i te marama Tepetema 2005. Ko te tumuanga koia oki kia rauka ia ratou rai i te akamarama mai i ta ratou porokaramu angaanga e te akapouanga moni no nga mataiti e 2 e tu mai nei. Kua orongaia kia ratou mei te 15-20 meneti i te tangata okotai kia tuatua ki roto i te uipaanga. Kua riro teia ravenga ei pumaana ki te au Directors e pera te Kumiti Akaaere i te kite marama anga i to tetai anoano. Kare oki mei te mea e ka noo ratou ki roto i te au uipaanga katoatoa a te Kumiti Akaaere, penei mei te 3 – 4 taime i te mataiti ka kapiki ia ratou kia piri mai. Ko te mea maata koia oki kia rauka i te Kumiti Akaaere i te kite marama i te au angaanga a teia au taeake e rave nei, e kia angaanga kapiti nga urupu tangata e rua.

### **5. Uipaanga a te WACC – Pacific Region**

E manga tetai no te World Council of Churches (WCC) koia te World Association of Christian Communications (WACC). Ko te tuanga WACC ireira i roto nei i te Pacific kua oronga mai ratou i te patianganga i te momua o teia mataiti 2005 ki te Kumiti Akaaere i mua na, kia rave i ta ratou uipaanga 4 mataiti ki te Kuki Airani nei. Kua arikiia te reira patianganga, e kua raveia ta ratou uipaanga ki te ngutuare o te vainetini i Takamoa mei te Monite 12 ki te Varaire 16 o Tepetema 2005. Kua riro e na te Minita o te Korona tei iaia te tuanga o te Religious Advisory Council (RAC) i akatuera i te uipaanga ki te Sinai Hall, Avarua CICC. Kua noo ratou ki te ngutuare Sinai, e kua riro nga Ekalesia e 6 i Rarotonga nei, e pera te tamaine Tungane Williams e tona tokorua, i te arikiroki atu ia ratou i te au ra tatakita. E 20 au taeake ma te au tuaine tei tae mai ki teia uipaanga, e ko Tungane Williams to tatou mata ki roto i teia kumiti o te WACC.

### **6. Akairo no Ratou tei Rave Maroiroi i te Angaanga i Roto i te Akonoanga**

E manako teia tei taikuia i roto i te Uipaanga Maata i topa ake nei, kua arikiia, e kua manako te Kumiti Akaaere kia taangaangaia i teia taime. Ka anoanoia ireira tetai akapapaanga (background) no te au taeake ma te au tuaine tei manako te au Ekalesia tatakita e, kia orongaia tetai

akangateiteianga kia ratou kia tau ki ta ratou i rave i roto i te Evangelia i te au tuatau i topa, e te ora nei rai ratou i teia ra.

Ko te patiangā ki konei, koia oki kia akamata kotou i te koikoi ma i te au tuatua no ratou tei tamanakoia ki runga i te taoanga akangateiteianga, ka tuku mai ei ki Rarotonga nei i te Kumiti Akaaere. Me tae mai teia au akapapaanga, ka kōkōuia ratou ki te ngai okotai, tukuna iatu ei ki te Kavamani na roto i te ruru minita, na ratou e iki i ta ratou ikianga, ka tuku atu ei ki te ariki vaine i Paratane.

## **7. Au Tamanakoanga Tienianga i te Ture Tumu**

Te maara ra ia kotou e ko te remit tei tukunaia ki roto i te uipaanga i topa no te akatere atu i te uipaanga mei te 2 ki te 4 mataiti, kua akaokiiā te reira ki roto i te au Ekalesia tatakitaī kia uri akaou ma te apai mai i te manako ki roto i te uipaanga e tu mai nei 2007.

Ko te manako ireira ki konei koia oki kia akara akaou te au Ekalesia tatakitaī i te ture tumu me e au ngai ke atu tetai i roto e kua manako kotou kia tieniia, takake mei te 2 ki te 4 mataiti uipaanga. Me e au ngai ke atu ta kotou ka manako kia tieniia, kia okotai rai o kotou akapapa anga mai i teia au tamanakoanga tienianga, ka tuku mai ei kia matou i Rarotonga nei. Noatu oki e kua oti takere te ture tumu i te akaouia, ka rauka rai te reira i te tieni akaou me kua manakoia e ka tieni akaou. No reira akarakara mai kotou i teia ngai. Ka inangarōiā to kotou au manako kia tae mai ki te Kumiti Akaaere e **6 marama i mua ake i te Uipaanga Maata 2007**. Auraka ra kotou e tiaki kia vaitata roa ki te reira tuatau akara i kotou i teia tumu manako. E mea puapinga e te meitaki kia akara vave kotou i rotopu i teia taime e te openga o teia mataiti ki mua 2006.

## **8. Araveianga a te Tekeretere Maata ki nga Ekalesia i Auckland**

E tere angaanga Kavamani to te Tekeretere Maata ki Samoa i te openga o te marama Tepetema i topa, inara na roto i te au ravenga takake a to tatou Atu, kua rauka te tikaanga manea kia aravei ma te rave angaanga atu ki roto i nga Ekalesia e 3 i Auckland, koia te Ekalesia Otara Central, Otahuhu, e East Tamaki, i te Sabati Oroa o teia marama Okotopa. Te oronga akaou atu nei au i taku akameitakianga maata kia koe e te taeake Rev. Joel Taime, Tekeretere Maata o te Konitara Ekalesia o New Zealand e pera to Auckland, no te porokaramu manea ta kotou i akanoo mai noku. Kia kotou katoatoa tei arikiriki mai iaku no te Atu, kia riro aia i te akakiki mai i ta kotou vairanga.

I teia taime poto iaku i rotopu i teia nga Ekalesia, kua kite mata tika i au i te ngateitei o teia taoanga ta kotou e te au Ekalesia i oronga mai ki toku rima i teia tuatau. Kua kite katoa au i te puapinga o te au Ekalesia tatakitaī kia atoroia rai e te Kumiti Akaaere. No reira kia kotou e te au Ekalesia takake mei nga Ekalesia i runga nei, irinaki au e te vai nei te tuatau ka aravei tatou ki roto i to kotou au koro; penei ko au ka tae atu, penei ko tetai o te au mata i runga i te Kumiti Akaaere. Ka tae atu rai te akakiteanga na mua.

## **9. Akatanotanoanga i roto i te Opati Maata i Takamoa**

Kua rauka tetai akatanotanoanga e te akameitaki atu anga i te tuanga angaanga a te Administration i roto i to tatou opati i Takamoa i teia tuatau. Mei teia oki te tu:

- i. Tamaine angaanga tinamou ki roto i te opati (full-time administration officer), ora 9.00am – 3.00pm i te au ra katoatoa, mari ua i te au ra orote
- ii. Numero phone tena e 26546, ka noo rai te numero fax ki te 26540
- iii. Email address e [adminpub@oyster.net.ck](mailto:adminpub@oyster.net.ck)
- iv. Kua paupau (network) iatu te au computers i roto i te opati ei ravenga i te akaiti mai i te akapouanga moni

Te vai atura te au ravenga no te akameitaki uatu rai i te turanga o te angaanga e raveia nei i roto i to tatou opati. Inara kua manako maua ko te Mou Moni e auraka tetai o teia au ngai kia amiri iatu i teia taime, kia tae rava ki te tuatau e oti mai ei te opati ou.

#### **10. Buka Tapu e te Buka Imene**

Te vai nei rai ta tatou Buka Tapu (soft cover) e te Buka Imene (hard cover), tena te moni tei akatakaia i roto i te karere a te Mou Moni i tuku atu kia kotou i nga epetoma i topa. Kua pou te soft cover Buka Imene, e te tae akaou mai nei tetai putunga Buka Tapu hard cover tei order takereia i mua na. Te akatanotano nei oki te Mou Moni i tetai ravenga kia tuku tika iatu ta kotou i New Zealand e Australia mei te ngai neneianga i Wellington. No reira te pati atu nei aia kia kotou i NZ e Australia kia tuku viviki ma i ta kotou order no te Buka Tapu Maori (hard cover), kia rauka teia akanoonoanga i runga nei i te rave iatu. Me kua anoano kotou i tetai na kotou, tuku mai i te order ki te Mou Moni.

#### **11. Ra Tae Anga Evangelia**

No kotou e te au Ekalesia i vao mai ia Rarotonga, te akateateamamao nei nga Ekalesia e 6 i Rarotonga nei no te akakoroanga o te nuku i teia mataiti te ka raveia ki te Ekalesia Titikaveka a te Ruitoru ra 26 o teia marama Okotopa. Tei roto oki te akateretereanga o te Konitara Ekalesia o Rarotonga nei i teia mataiti i te rima o te Ekalesia Titikaveka, e na ratou i akanoo i te porokaramu nuku no teia mataiti. Irinaki matou i Rarotonga nei e ka riro teia ra ei mea manea, puapinga e te papanunui no tona akakoroanga. Pera katoa matou i Rarotonga nei i te irinakianga e ka riro katoa ta kotou au akamaaraanga i teia ra ei mea manea katoa ki mua i te aroaro o to tatou Atu i te ao.

#### **12. Moni Akaputu ki Takamoa**

Tena te pepa a te Mou Moni Maata o ta tatou akonoanga irinaki au e kua tae atu kia kotou katoatoa. Akamaaraara uatu kia kotou no te tuanga ki Takamoa, e pera te tuanga no te opati ou (new administration building).

Kua marama te Kumiti Akaaere e te vai nei tetai au Ekalesia e kite nei i te ngata o teia tuanga no tetai au tumuanga meitaki kare e rauka kia akaapaia. Me ko kotou tetai i roto i teia turanga, tuku mai i te akakiteanga e te patiangi ki Takamoa nei, kia rauka i te Kumiti Akaaere e pera te kumiti o te moni i te kite marama atu ki roto i to kotou au tai'i. Penei na roto i ta kotou tata anga mai, e rauka'i tetai akanoonoanga no te akamama mai i ta kotou apainga.

Te vai katoa nei te au Ekalesia kare o ratou manamanata no te au apainga o te moni akaputu tei orongaia ki to ratou rima. Kia akameitakiia te Atua no teia e kia maroiroi uatu rai kotou no te au tuatau ki mua.

#### **13. Tamanakoanga no te Uipaanga Maata 2007 ki New Zealand**

Kua ariki te Kumiti Akaaere kia oronga i tetai tuatau kia uriuri nga Ekalesia i New Zealand no teia tamanakoanga. I te Tekeretere Maata i NZ (akara ki te **tuanga 8** o teia pepa), kua akamarama akaou aia i teia tumu manako ki roto i te uipaanga, e pera tika'i te au ngai e mama ei te apainga kia ratou me kua manako ratou i NZ e ka apai i teia apainga. Noatu e kua rauka mai te manako o te maata anga o nga Ekalesia i NZ no runga i teia tamanakoanga, kua manako te Tekeretere Maata e kia vao ua i teia manako kia pou rava mai te manako o nga Ekalesia i NZ ki roto i ta tatou Konitara, ireira te Konitara e tuku mai ei i ta ratou tika ki Rarotonga nei. Kua orongaia oki kia ratou kia tae mai te manako i mua ake i te openga o teia mataiti 2005, kia rauka i te akakite viviki ki roto i te au Ekalesia katoatoa.

#### **14. Punanga o te au Ekalesia e te Aronga Anqaanga (contact addresses)**

Tena te akapapaanga o te au ngai nooanga e te au numero phone, fax, emele, a kotou e te au Ekalesia e pera te aronga rave angaanga. Ko teia oki te vai nei ki roto i te akapapaanga i Takamoa nei. Ka inangaro maataia kotou kia rave i teia au mea i raro nei:

- i. Akapapu me kua tano te tataanga; me kua tano, akakite mai. Me kare i tano, tuku mai i te akatanoanga kia rauka te rekoti i roto nei i te opati i te akatanoia kia kore tatou e tai'i a teia au tuatau ki mua.
- ii. Tetai au ngai kare e numero i roto i te akapapaanga, mei te numero phone. E tano ei e, e phone ta te au Ekalesia katoatoa. Kare e manamanata me kare a kotou fax e te emele; ko te phone ra, e mea puapinga kia tuku mai kotou i te reira.
- iii. Te vaira tetai au ngai kare e ingoa i roto i te akapapaanga i Takamoa nei, mei te Tekeretere o tetai au Ekalesia kare i papu e koai ma ratou. Tuku mai i te au ingoa kia vai ki te vairanga. E mea puapinga kia tuku katoa mai kotou i te ingoa o to kotou au mou moni, mei to nga Ekalesia e kite ra kotou i roto i te akapapaanga.

Penei ka tuatua kotou e kua tuku takere maina kotou i teia au mea i te au tuatau i topa. Kua tano rai paa ta kotou, inara penei no te tienianga o te aronga rave angaanga i roto i to tatou opati, e pera te au rekotianga, i tu kaui ei tetai au ngai o te akapapaanga. No reira, kia tika kia akapapu akaou mai i to kotou au turanga, kia kore rava tetai apopo atu e karanga mai e, *"kare rava e pepa me kore tuatua i tae mai ana kia matou."*

#### **15. Turanga o te Nuti Evangelia**

Te akapapa nei te tuanga o te nenei e te tata karere (Publications) i te akamata akaou i te tata i ta tatou nuti pepa koia te Nuti Evangelia, mei tei arikiia i roto i te Uipaanga Maata i oti uake nei e kia rave akaouia. No reira me e au nuti me kore tuatua akakite ta kotou, ka ariki rekareka matou i roto i to tatou opati i Takamoa kia tuku mai kotou no te akao atu anga ki roto i te Nuti Evangelia a teia au tuatau ki mua.

#### **16. Akanoonoanga o te Tauiana Orometua 2007**

Tena te remit a tetai Ekalesia a tatou no runga i te akanoonoanga o te tauiana Orometua kua arikiia e ta tatou Uipaanga Maata i oti uake nei, koia oki kia o mai tetai au taeake kare i te Orometua, ki runga i te kumiti tau Orometua. I muana oki, e au Orometua ua te rave ana i teia tuanga. Meia ratou, ki roto i te Kumiti Akaaere, oronga iatu ei ki roto i te Uipaanga Maata.

Mei ta kotou e nga metua tane i pati mai kiaku i muri ake i te Uipaanga Maata, kua oronga au i te manako ki roto i te Kumiti Akaaere e kia tuaia teia au mata kare i te Orometua, e tai no New Zealand, e tai no Australia, e tai no te Kuki Airani nei. Te taitaia nei ra au i te ripoti atu e i roto i te uipaanga a te Kumiti Akaaere i te epetoma i topa, kare te kumiti i ariki i teia tamanakoanga. Teia te tumuanga koia oki no te akapouanga moni i te apai mai i nga mata o New Zealand e Australia i te tuatau e uipaanga'i teia kumiti tau Orometua. Kua tamanakoia oki e 2 ona taime e uipa ei.

Teia ireira te manako o te Kumiti Akaaere, kia riro rai e nana – koia oki na te Kumiti Akaaere – e rave i teia angaanga. Mei ta kotou i kite, tei runga i te Kumiti Akaaere te au mata e Orometua ratou e pera tetai pae kare ratou i te Orometua. Ka meitaki ua ireira e na ratou e rave i te angaanga, i roto i te irinakianga o te Kumiti Akaaere. Kare ireira e riro akaou e na te Kumiti Orometua e rave i teia tuanga; ka apai te Kumiti Akaaere i teia apainga, e oti akaari ei i tana au tamanakoanga ki roto i te Uipaanga Maata e tu mai nei. Noatu ra teia, e atianga tetai ka oronga iatu kia kotou e te au Orometua e ta kotou au Ekalesia, kia akarakara i te tamanakoanga mua a te Kumiti Akaaere, i mua ake ka tukuna ia'i ki roto i te Uipaanga Maata. A teia au tuatau ki mua, ka akamaata atu au i te tuatua no teia akakoroanga maata e te puapinga.

### 17. Tauturu Orometua Ou no te Ekalesia Arutanga, Aitutaki

Kua tae mai te patianganga a te Ekalesia Arutanga, Aitutaki, kia tae atu maua ko te President ki te akatainuanga i to ratou Orometua ou koia a Taia Charlie i te Oroa o teia marama ki mua Noema 2005. Ko Taia oki tei mono atu i te metua tane Tikaka Henry tei akangaroi atu no te apikepiki o te kopapa. Ka tae maua ki Aitutaki i te Maanakai ra 5 no Noema, rave te angaanga i te Sabati ake, oki mai ei ki Rarotonga nei a te Monite 7 Noema. Ia maua i Aitutaki, ka aravei katoa iatu tetai nga Ekalesia e rua, koia a Vaipae e Tautu. Penei ka rauka tetai atianganga no te uipa atu ki te Konitara Ekalesia i runga i te enua.

### 18. Popani

Tena ireira e te au taeake ma te au tuaine te au mea tei anoano ta kotou Kumiti Akaaere kia oronga akakite atu ei kiteanga no kotou i te au mea e tupu nei, me kore ra e parani ia nei no teia au tuatau ki mua i roto i ta tatou nei akonoanga. Irinaki matou e ka riro teia au akakitekiteanga ei pumaana ki roto i to kotou au ngakau tatakita. E tai karere toe taku e manako nei i te tuku atu i mua ake ka pou ei teia mataiti 2005, penei i roto ia Titema tuku iatu ei teia.

Ei taopenga i teia karere, te na ko nei a Paulo, *“E te openga o taku nei tuatua, e aku au taeake, kia ora na. Kia tika rava, kia pumaana rava, kia okotai rai ngakau, kia noo ma te au; e e noo ia te Atua nona te aroa e te au i rotopu ia kotou.”*

Ei konei tatou i te tuatua i tona aroa ua, Amene.

Otira ua, .....  
 Nga Mataio  
Tekeretere Maata